

1981-08-18 – SS Ioannes Paulus II – Littera ‘Tanta Est’

IOANNES PAULUS PP. II

LITTERAE APOSTOLICAE

TANTA EST

**BEATA MARIA VIRGO, QUAM POPULUS VULGARI SERMONE HONORAT
PER TITULUM «NUESTRA SEÑORA DE LA PRESENTACIÓN»,
COFIRMATUR PATRONA DIOECESIS S. PHILIPPI IN VENETIOLA**

Ad perpetuam rei memoriam. – Tanta est beatæ Mariæ Virginis amplitudo et gloria, ut quævis aut religio, aut cultus, aut honor, si cum illius dignitate componatur impar cedat oportet. Est enim illa Christi, Filii Dei, castissima parens, et caelorum Regina, et fidissima christianorum tutela, quæ filiorum necessitatibus materna cura medetur. Haec sane causa est, cur Nos, ceu alteram Matrem aestimantes, et honorem ipsi quam maxime potest, et coli eam a Christifidelibus gaudeamus. Qua re, cum Venerabilis Frater Thomas E. Márquez Gómez, Episcopus S. Philippi in Venetiola, pietate motus qua clerus populusque suus in beatissimam Virginem Mariam fertur sub titulo vulgo «Nuestra Señora de la Presentación», et probaverit electionem eius in Patronam dioecesis, et poposcerit a Nobis ut electionem atque probationem a se factam confirmaremus ad normam «Instructionis de Calendariis particularibus atque Officiorum et Missarum Propriis recognoscendis», n. 30, Nos, ea rata habentes, quæ Sacra Congregatio pro Sacramentis et Cultu Divino hac de re statuerit factis a Nobis olim potestatibus, libenti animo postulatis concedimus, nempe ea spe fore ut per oblatam occasionem et tantæ Matris affectus crescat in animis, et per illam Dei gloria magnopere gliscat. Placet ergo beatam Virginem Mariam quam populus «Nuestra Señora de la Presentación» appellare consuevit, Patronam dioecesis S. Philippi aequè esse et haberi, cum iuribus et privilegiis quæ titulus ille comportat. Contrariis nihil obstantibus.

Datum Romæ, apud S. Petrum, sub anulo Piscatoris, die XVIII mensis Augusti, anno MDCCCCLXXXI, Pontificatus Nostri tertio.

AUGUSTINUS Card. CASAROLI, a publicis Ecclesiae negotiis